

四庫全書

經部

欽定四庫全書

經部

詩集傳卷十六

詳校官監察御史臣左周

通政使司副使臣莫瞻孫覆勘

覆校官編修臣茅元銘

校對官檢討臣郭寅

膳錄監生臣劉書

欽定四庫全書

詩集傳卷十六

宋 蘇轍 撰

生民之什

大雅

生民尊祖也

周公制禮推尊后稷以配天故為此詩言其所以尊  
之

厥初生民時維姜嫄生民如何克禋克祀以弗無子履  
帝武敏歆攸介攸止載震載夙載生載育時維后稷

禋敬也弗被也武迹也敏拇也介覺也震娠也夙肅也后稷之母姜氏之女曰嫫為帝嚳元妃稷之生也姜嫫禋祀郊禠以被去無子之疾見大人迹焉而履其拇歆然感之若有覺其止之者於是有身肅戒不御而生后稷蓋此詩言后稷之生甚明無可疑者然毛氏獨不信曰履帝武者從高辛行也余竊非之以履帝武為從高辛行歟至於牛羊字之飛鳥覆之何哉要之物之異於常物者其取天地之氣弘多故其

生也或異虎豹之生異於犬羊蛟蜃之生異於魚鱉  
物固有然者神人之生而有以異於人何足怪哉雖  
近世猶有然者然學者以其不可推而莫之信夫事  
之不可推者何獨此以耳目之陋而不信萬物之變  
物之變無窮而耳目之見有限以有限待無窮則其  
為說也勞而世不服古之聖人不然苟誠有之以不  
所見疑所不見故河圖洛書稷契之生皆見於詩易  
不以為怪其說蓋廣如此後世復有聖人無是固不

可少之而有是亦不足怪此聖人之意也

誕彌厥月先生如達不圻不副無菑無害以赫厥靈上帝不寧不康禋祀居然生子

誕大也彌終也達羊子也后稷姜嫄之元子也既終其月而生其生也如達之易赫然甚異於人此豈上帝不安之哉然姜嫄乃反以其由禋祀之故居然無疾而生子是以不安而棄之

誕寘之隘巷羊腓字之誕寘之平林會伐平林誕寘

之寒冰鳥覆翼之鳥乃去矣后稷呱矣

寘置也腓辟也字愛也覆蓋也翼藉也呱泣聲也於是知有天異往取之矣

實覃實訐厥聲載路誕實匍匐克岐克嶽以就口食蓺之荏菹荏菹旆旆禾役穰穰麻麥幪幪瓜瓞嗶嗶

覃長也訐大也岐嶽嶽峻茂也言后稷之生其體實長且大其聲則載於路矣及其始匍匐以就食也其形則已岐嶽矣及其稍壯遂知樹蓺五穀言出於

其性也荏菽大豆也旆旆長也役行列也穰穰苗好也蒙蒙苗盛也嗷嗷多實也

誕后稷之穡有相之道第厥豐草種之黃茂實方實苞實種實裒實發實秀實堅實好實穎實栗即有邠家室相助也第荒也黃茂嘉穀也方極畝也苞茂也種生不雜也裒長也發發管也秀華也穎垂穎也栗不秭也后稷之為稷官也稼穡常若有助之者雖第穢豐草之地皆能以生嘉穀故堯封之於邠使即其母之



家而居之邵姜嫄父母國也在今武功

誕降嘉種維秬維秠維糜維芑恒之秬秠是穫是畝恒之糜芑是任是負以歸肇祀

秬黑黍也秠一稃二米也糜赤苗也芑白苗也恒徧也任擔也肇始也后稷既封而獲嘉種曰天寶降此於是徧種之既成穫而棲之於畝負任以歸而始祭天焉

誕我祀如何或春或揄或簸或蹂釋之叟叟烝之浮浮

載謀載惟取蕭祭脂取羝以軋載燔載烈以興嗣歲  
揄抒曰也蹂揉熟之也釋浙米也叟叟聲也浮浮氣  
也既治其米以待祭祀於是謀祭之日思祭之備又  
其將祭則取蕭草與祭牲之脂爇之於行神之位馨  
香既聞取羝羊之體以祭神又燔烈其肉以為尸羞  
然後祀輶而往郊所以興來歲繼往歲也此所謂孟  
春祈穀于上帝

印盛于豆于豆于登其香始升上帝居歆胡臭亶時后

稷肇祀庶無罪悔以迄于今

卬我也木曰豆瓦曰登豆薦菹醢登薦大羹亶信也  
時是也言非獨其芳臭信能至是也自后稷始祭天  
而無罪悔以至于今是以天饗之也古者天子祭天  
地諸侯祭社稷此禮之不可易者也然后稷堯之諸  
侯周公周之諸侯也而皆得祭天此何禮也澤水之  
後民方阻饑后稷教之播種民於是獲粒食天寶祐  
之而錫之嘉種詩曰誕降嘉種維秬維秠維糜維芑

又曰貽我來牟帝命率育及周公遭流言之變成王  
疑之天大雷電以風禾偃木拔及成王啓金縢之書  
知其以周公故也將迎周公為之出郊而天乃雨反  
風禾則盡起蓋二公之德上昭於天天所以佑之者  
如此故堯與成王因天之意而使之祭天非私許之  
也不然二公之世賢者多矣而皆不得祭天蓋天命  
之所不及故也

生民八章四章章十句四章章八句

行葦忠厚也

敦彼行葦牛羊勿踐履方苞方體維葉泥泥

敦聚貌也行道也苞本也體榦也泥懦弱貌也道上之葦其為物也微矣仁人君子將於是求哉然謂其方且欲生也故禁牛羊使勿踐之而況於人乎故王者內則親睦九族外則尊事黃耆凡以無逆其性而非有所望之也此所謂忠厚也

戚戚兄弟莫遠具爾或肆之筵或授之几

戚戚相親也爾近也肆成也少者肆筵而已老者加之以几

肆筵設席授几有緝御或獻或酢洗爵奠筯

緝續也御侍御也筯亦爵也兄弟之老者既陳之筵又設之以重席既授之几又有相代而侍之者主人獻賓賓酢主人主人洗爵而酌賓則賓受而奠之不舉也

醢醢以薦或燔或炙嘉殽脾臠或歌或嘏

醢醢醢之多汁者也薦禮非菹則醢醢燔肉也炙肝也臠函也脾函所以為加也歌者比於琴瑟徒擊鼓曰嘏

敦弓既堅四鍤既鈞舍矢既均序賓以賢

敦弓畫弓也鍤矢也鈞參亭也均四隅均也賢射中多也此將養老而以射擇其賓也

敦弓既句既挾四鍤四鍤如樹序賓以不侮

句殼通射禮搢三挾一既挾四鍤則徧釋矣不侮敬

也

曾孫維主酒醴維醕酌以大斗以祈黃耆

曾孫謂成王也醕厚也大斗其長三尺祈告也酒醴  
既備則以告於黃耆而養之

黃耆台背以引以翼壽考維祺以介景福

台鮐也大老其背有鮐文引導之也翼左右之也祺  
吉也

行葦八章章四句



既醉太平也

既醉以酒既飽以德君子萬年介爾景福

周自文王至於成王而天下平無所復事故君子作  
此詩言王與羣臣祭畢而燕於寢旅酬至無算爵醉  
之以酒而飽之以德臣之所以願其君者反復而不  
厭此謂太平也

既醉以酒爾殽既將君子萬年介爾昭明

將行也昭明顯著於天下也

昭明有融高朗令終令終有俶公尸嘉告

融和也俶始也昭明而能和高朗而能終終而復始  
福無窮也尸以是無窮之福俶於成王王者以卿為  
尸天子之卿有以諸侯為之故曰公尸

其告維何籩豆靜嘉朋友攸攝攝以威儀

尸之所以俶主人者以其籩豆靜嘉君臣相救以無  
違禮故也朋友王之友臣也攝檢也

威儀孔時君子有孝子孝子不匱永錫爾類

君子之事神其禮無不時者故神錫之以孝子孝之  
施於人無窮故又能錫其類

其類維何室家之壺君子萬年永錫祚胤

壺廣也能錫其類則室家之廣皆將化之則其胤嗣  
無不賢者矣

其胤維何天被爾祿君子萬年景命有僕其僕維何釐  
爾女士釐爾女士從以孫子

僕屬也釐予也天之所以屬之者予之以女子而有

士君子之行者也予之以女士而其子孫無不賢者  
矣

既醉八章章四句

鳧鷖守成也

鳧鷖在涇公尸來燕來寧爾酒既清爾殽既馨公尸燕  
飲福祿來成

守成者守先王之成法而無所損益之謂也故此詩  
言祭畢而燕尸潔其酒食而將之以敬不失其故而

已尸之在廟也其容安詳鳧鷖之為物也愿而遲其  
貌似焉鳧鷖皆水鳥涇水名也

鳧鷖在沙公尸來燕來宜爾酒既多爾殽既嘉公尸燕  
飲福祿來為

為助也

鳧鷖在渚公尸來燕來處爾酒既滑爾殽伊脯公尸燕  
飲福祿來下鳧鷖在梁公尸來燕來宗既燕于宗福祿  
攸降公尸燕飲福祿來宗

淥水會也來宗來尊也崇重也

鳧驚在亶公尸來止熏熏旨酒欣欣燔炙芬芬公尸燕飲無有後艱

亶山絕水也熏熏和說也欣欣樂也芬芬香也

鳧驚五章章六句

假樂嘉成王也

假樂君子顯顯令德宜民宜人受祿于天保佑命之自天申之

假嘉也春秋傳作嘉樂申重也言天之於成王反覆申重而不厭是以保佑而命之也

千祿百福子孫千億穆穆皇皇宜君宜王不愆不忘率由舊章

成王千祿而得百福故其子孫之蕃至于千億適為天子庶為諸侯無不穆穆皇皇以遵成王之法者威儀抑抑德音秩秩無怨無惡率由羣臣受福無疆四方之綱

無所不容故無怨無所不矜故無惡從衆之欲而已  
不自為是以能受無疆之福為四方之綱

之綱之紀燕及朋友百辟卿士媚于天子不解于位民  
之攸暨

燕安也暨息也成王紀綱四方而臣下賴之以安故  
百辟卿士思所以媚之者曰維不解于位不解于位  
故民獲休息也

假樂四章章六句



公劉召康公戒成王也

篤公劉匪居匪康廼場廼疆廼積廼倉廼褰餼糧于橐  
于囊思緝用光弓矢斯張干戈戚揚爰方啓行

后稷始封于郃傳于不窋而失其官犇於戎狄之間  
再世不顯其孫公劉復修后稷之業始居於豳故召  
公稱之以教成王言公劉之在西戎也不康其居外  
則治其疆場內則積其倉廩內外繕完則褰其餼糧  
思以輯和其民而光其先祖於是用兵於四方以啓

敵之行陳而幽國於是始立爲厚也戚斧也揚鉞也  
篤公劉于胥斯原旣庶旣繁旣順廼宣而無永歎陟則  
在嘽復降在原何以舟之維玉及瑤鞞琿容刀

胥相也宣導也舟奉也公劉之相其田原也其民則  
已繁庶矣公劉又能順其所欲而後導之以事故其  
民勞而不怨公劉則與之陟嘽而降原民滋愛之於  
是相與進其玉瑤容刀之佩以帶之愛之至也

篤公劉逝彼百泉瞻彼溥原廼陟南岡乃覲于京京師

之野于時處處于時廬旅于時言言于時語語

溥廣也京大陵也直言曰言論難曰語公劉之營京  
邑也審矣自下觀之則往百泉而望廣原自上觀之  
則陟南岡而覲京師審其可處矣則經畫以定之曰  
此可以居居民此可以廬賓旅此可以施教令此可  
以議政事蓋自遷幽至此而始有朝廷邑居之正焉  
篤公劉于京斯依蹢躅濟濟俾筵俾几既登乃依乃造  
其曹執豕于牢酌之用匏食之飲之君之宗之

公劉依京以營邑宮室既成其士蹕蹕其大夫濟濟  
皆會於朝公劉則命設几筵而饗之賓登席依几乃  
造其羣牧搏豕而烹之以為飲酒之醑醑用豕酌用  
匏新國殺禮也

篤公劉既溥既長既景廼岡相其陰陽觀其流泉其軍  
三單度其隰原徹田為糧度其夕陽鹵居允荒

宮室既成則治其田原既廣且長矣於是考之以日  
景參之以高岡以相其陰陽寒煖之宜水泉灌溉之

利辨其土宜以授野人古者大國三軍以其餘卒為  
羨自周之遷而其民未集丁夫適滿三軍之數而無  
羨卒故曰其軍三軍度其原隰之田以徹法頒之一  
夫百畝則三軍之民適皆給足於是又度其山西之  
田以廣之而幽人之居於此益大什一而稅曰徹山  
西曰夕陽允信也荒大也

篤公劉于豳斯館涉渭為亂取厲取鍛止基乃理爰衆  
爰有夾其皇澗遡其過澗止旅廼密芮鞠之即

宮室既成田野既治則營其邑居其營邑也事有其  
備物有其處至於厲鍛之微皆有所取之亂絕流也  
厲鍛石之可以治斤斧者也基邑之所在也言其始  
為之基也則已順其理矣故其成而居之則益衆而  
益有其居有夾澗者有遡澗者皇過二澗名也旅衆  
也其後所居之衆益密乃復即其澗之芮鞠而居之  
水之內曰芮其外曰鞠或曰芮水出其山西北東入  
涇芮鞠芮水之外也此詩言公劉之在豳其業甚微

其功甚勤所以深戒成王使不忘敬也

公劉六章章十句

洞酌召康公戒成王也

洞酌彼行潦挹彼注茲可以饔飩豈弟君子民之父母  
洞遠也行潦流潦也饔飩也饔酒食也流潦水之薄  
者然苟挹而注之則可以饔飩言物無不可用也是  
以君子之於人未嘗有所棄猶父母之無棄子也或  
曰雖行潦汙賤之水苟挹之於彼而注之於此則遂

卷十六  
可以饒饒孟子曰雖有惡人齋戒沐浴而可以祀上帝此所以為戒成王也

洞酌彼行潦挹彼注茲可以濯壘豈弟君子民之攸歸壘所以盛酒

洞酌彼行潦挹彼注茲可以濯漑豈弟君子民之攸暨暨息也

洞酌三章章五句

卷阿召康公戒成王也



有卷者阿飄風自南豈弟君子來游來歌以天其音

卷曲也風之為物無所不入未有能禦之者維曲阿  
卷然當道則風自其南而去無自入之矣小人之能  
得其君亦如風然雖欲多方以拒之然其入也有道  
維得樂易之君子而與之游彼見其容貌聞其聲音  
而自去矣子夏曰舜有天下選於衆舉臯陶不仁者  
遠矣湯有天下選於衆舉伊尹不仁者遠矣

伴奂爾游矣優游爾休矣豈弟君子伴爾彌爾性似先

公曾矣

伴奂縱弛之意也彌終也似肖也曾就也人君伴奂  
優游無所事者維得樂易君子以終成其性則能肖  
先君而就其業矣性之於人莫不固有之也然不得  
賢者則不能自成

爾土宇畋章亦孔之厚矣豈弟君子伴爾彌爾性百神  
爾主矣

畋大也章著也人君土宇大而且著其厚甚矣維得

君子以成其性而後山川神祇咸主之也

爾受命長矣第祿爾康矣豈弟君子俾爾彌爾性純嘏爾常矣

第多也嘏福也人君受命既長百祿既康維得君子以成其性而後能常享此福也

有馮有翼有孝有德以引以翼豈弟君子四方為則在前則有馮在側則有翼孝著於內德施於外以此引翼其君而為四方則維豈弟君子為能當之耳

顓顓印印如珪如璋令聞令望豈弟君子四方為綱  
顓顓印印高明也如珪如璋純潔也遠之則有令聞  
近之則有令望亦維豈弟君子為能當之

鳳凰于飛翾翾其羽亦集爰止藹藹王多吉士維君子  
使媚于天子

翾翾羽聲也藹藹衆多也鳳凰之飛而能集於其所  
止者衆羽之力也然而用羽者鳳也不得其用羽者  
則亦安能至哉王之吉士亦衆矣然必有君子以使

之而後能媚天子也

鳳凰于飛翾翾其羽亦傳于天藹藹王多吉人維君子  
命媚于庶人鳳凰鳴矣于彼高岡梧桐生矣于彼朝陽  
萋萋萋萋離離喈喈君子之車旣庶且多君子之馬旣  
閑且馳矢詩不多維以遂歌

山東曰朝陽鳳之性非梧桐不棲非竹實不食故鳳  
凰鳴于高岡將欲得而畜之則植梧桐於朝陽以待  
之使梧桐之盛至於萋萋萋萋也則鳳凰鳴於其上

雖雖啗啗矣維君子亦然其德有以絕於衆人而衆人待之則將不至故其所以載之者車必庶而多馬必閑而馳以此待之庶曰苟至焉成王之朝蓋有是人而王不知歟故召公為此詩其所陳者不多也維告以遂用之而已

卷阿十章六章章五句四章章六句

民勞召穆公刺厲王也

民亦勞止汔可小康惠此中國以綏四方無縱詭隨以

謹無良式遏寇虐懣不畏明柔遠能邇以定我王

汙幾也中國京師也詭隨者不顧是非而妄從人也  
人未有無故而妄從人者維無良之人將悅其君而  
竊其權以為寇虐則為之故無縱詭隨則無良之人  
肅無良之人肅則寇虐無畏之人止然後柔遠能邇  
而王室定矣

民亦勞止汙可小休惠此中國以為民逌無縱詭隨以  
謹懣恠式遏寇虐無俾民憂無棄爾勞以為王休

逮聚也昏亂也爾勞舊勞也

民亦勞止汙可小息惠此京師以綏四國無縱詭隨以  
謹罔極式遏寇虐無俾作慝敬慎威儀以近有德民亦  
勞止汙可小愒惠此中國俾民憂泄無縱詭隨以謹醜  
厲式遏寇虐無俾正敗戎雖小子而式弘大

愒息也泄去也厲惡也戎女也王雖小子自過然用  
事於天下甚大不可不慎也

民亦勞止汙可小安惠此中國國無有殘無縱詭隨以



謹繾綣式遏寇虐無俾正反王欲玉女是用大諫

繾綣小人之固結其君者也王欲玉女欲使王德純  
備如玉也

民勞五章章十句

板凡伯刺厲王也

凡伯周公之後為王卿士

上帝板板下民卒瘁出話不然為猶不遠靡聖管管不  
實於宣猶之未遠是用大諫

板板反覆不定也痺病也管管無所不事也亶誠也天之禍福反覆不定厲王一失其德而民皆不安告之以話言則不信聽其自為謀則不遠自非聖人而欲無所不事不自實於其所誠能而止君子知其將敗而幸其謀之未遠故作此詩以大諫之

天之方難無然憲憲天之方蹶無然泄泄辭之輯矣民之洽矣辭之懌矣民之莫矣

難艱難也蹶震動也憲憲猶軒軒也泄泄猶沓沓也

輯和也莫定也厲王暴虐恣行故告之曰天今方為  
艱難以震動周室無為是軒軒而不顧沓沓而不已  
是不能以服民祇以速亂而已民之不順非有異志  
也畏王之無厭而求以自免耳苟無欲害之之心而  
出好言焉民今洽而定矣

我雖異事及爾同寮我即爾謀聽我囂囂我言維服勿  
以為笑先民有言詢于芻蕘

君子欲諫王則又以告其寮之信於王者庶幾王信

之而其言易入囂囂行不顧也服服行也

天之方虐無然謔謔老夫濯濯小子蹻蹻匪我言耄爾用憂謔多將煢煢不可救藥

謔謔戲侮也濯濯款誠也蹻蹻驕貌也煢煢熾盛也言天方將為虐以敗王安得以為戲而不信哉老者知其不可而盡其款誠以告之少者不信而驕之故曰非我老耄而妄言乃女以憂為戲耳夫憂未至而救之猶可為也苟俟其益多則如火之盛不可復救

矣

天之方憐無為夸毗威儀卒迷善人載尸

憐怒也夸大也毗附也小人之於人不以大言夸之  
則以諛言毗之或夸或毗而威儀迷亂則雖善人將  
相從尸其禍矣

民之方殿屎則莫我敢葵喪亂蔑資曾莫惠我師

殿屎亦作唵呻吟呻吟也葵揆也民方愁苦呻吟莫測  
其所欲方世之喪亂困竭又曾無以惠之者變之興

也何日之有

天之牖民如堦如筵如璋如圭如取如攜攜無曰益牖民孔易民之多辟無自立辟

聖人之導民如暗者之願明而為之牖焉導其天也是以託之於天堦筵以言其和也圭璋以言其合也攜取以言其易也然其導之也攜之而已不求多於民是以其導之也甚易今厲王求之已甚民尚安甯從王哉方世之治也天下咸聽其上而有一不從故

刑足以勝之今天下皆不順雖有刑辟尚何從立之  
哉故以次章教之使懷來其羣臣

价人維藩大師維垣大邦維屏大宗維翰懷德維寧宗  
子維城無俾城壞無獨斯畏

价大也大人衆所服也大師大衆也大邦大諸侯也  
大宗強族也宗子同姓也此五者皆王之屏蔽以德  
懷之則合否則離散無以自安矣人皆曰無俾城壞  
城之壞也則知畏之五者之蔽有甚於城而莫知畏

其壞也所謂小人務知小者近者而已

敬天之怒無敢戲豫敬天之渝無敢馳驅昊天曰明及爾出王昊天曰旦及爾游衍

王往也旦明也天之明也人未有行而不從者柰何不畏也

板八章章八句

詩集傳卷十六



欽定四庫全書

詩集傳卷十七

宋 蘇轍 撰

蕩之什

大雅

蕩召穆公傷周室大壞也

蕩之所以爲蕩由詩有蕩蕩上帝也毛詩之序以爲天下蕩蕩無綱紀文章則其所以名篇非其詩之意矣

蕩蕩上帝下民之辟疾威上帝其命多辟天生烝民其

命匪譖靡不有初鮮克有終

蕩蕩廣大貌也天之廣大下民之所君也今民被厲王之禍咸謂天迅烈無恩而多淫辟之命何者天之生民其命不可復信莫不有初而無終者言生之於治而終之於亂也

文王曰咨咨女殷商曾是彊禦曾是掊克曾是在位曾是在服天降惱德女興是力

召公知厲王之將亡故為此詩稱文王所以咨嗟商

紂蓋傷周室將有此禍也彊禦彊梁捍禦不可告教  
之人也培克培斂克深少恩之人也朝廷之在位服  
事者皆是人也惛慢也力任也天降是人以妖孽天  
下女又興而任之何哉

文王曰咨咨女殷商而秉義類彊禦多懟流言以對寇  
攘式內侯作侯祝靡屆靡究

凡秉義以事女者女則以為彊禦多怨之人凡民怨  
讟流傳之言有以告者女則以為寇攘於內至於小

人詐僞無實唯以祝詛相要女則不復窮極其情僞而遂受之何也作或作詛

文王曰咨咨女殷商女魚然于中國斂怨以為德不明爾德時無背無側爾德不明以無陪無卿

魚然氣健貌也無背無側前後左右無良臣也陪陪貳也

文王曰咨咨女殷商天不湏爾以酒不義從式旣愆爾止靡明靡晦式號式呼俾晝作夜

涵沉涵也止容止也人之沉涵非天使然也凡百不義皆將從是起故旣愆爾止則無所不至矣

文王曰咨咨女殷商如蜩如蟴如沸如羹小大近喪人尚乎由行內禩于中國覃及鬼方

蜩蟬也蟴蟻也禩怒也飲酒號呼之聲如蜩蟴沸羹之亂君臣以是危於喪亡而人猶從之亂止於京師而鬼方皆被其禍言惡之遠也

文王曰咨咨女殷商匪上帝不時殷不用舊雖無老成

人尚有典刑曾是莫聽大命以傾文王曰咨咨女殷商人亦有言顛沛之揭枝葉未有害本實先撥殷鑒不遠在夏后之世

顛仆也沛拔也揭發也大木之拔非枝葉之患所能為也其本實先自撥矣譬如商周之衰典刑未廢諸侯未畔四夷未起而其君不義以自絕於天下莫可救也言商之鑒在夏則周之鑒在商明矣

蕩八章章八句

抑衛武公刺厲王亦以自警也

宣王十六年衛武公卽位年九十有五而作此詩蓋  
追刺厲王以自警也

抑抑威儀維德之隅人亦有言靡哲不愚庶人之愚亦  
職維疾哲人之愚亦維斯戾

抑抑密也隅廉也戾罪也天下有道則賢者可外占  
而知內譬如宮室內有繩直則外有廉隅至於亂世  
賢者不容則毀其威儀佯愚以辟禍故曰庶人之愚

亦其職耳譬如疾病雖欲免而不得哲人之愚非其質然也畏罪故耳

無競維人四方其訓之有覺德行四國順之訏謨定命遠猶辰告敬慎威儀維民之則

競彊也訓馴也覺直也訏大也辰時也為國者得人則彊失人則弱循道者民之所順而背理者民之所叛也故人君必先任賢臣內秉直德以服天下然後先事而大謀以定政命遠圖而時告之政事既脩又



能敬其威儀以為民則則所以為國者略備矣

其在于今興迷亂于政顛覆厥德荒湛于酒女雖湛樂從弗念厥紹罔敷求先王克共明刑

今厲王作起迷亂之人而任之以政又顛覆其德荒湛于酒不念先王之典刑而尚何以為國哉

肆皇天弗尚如彼流泉無淪胥以亡夙興夜寐灑掃庭內維民之章脩爾車馬弓矢戎兵用戒戎作用邊蠻方天不屑厲王之行君子憂之恐其如衆之流相陷以

就亡竭故教之使脩其政事以自救戒備也戎兵也  
作起也過遠也

質爾人民謹爾侯度用戒不虞慎爾出詒敬爾威儀無  
不柔嘉白圭之玷尚可磨也斯言之玷不可為也

質成也侯度天子所以御諸侯之度也天子苟內失  
其人民而外慢其諸侯則將有不虞之禍起夫怨不  
在大言語之不愼威儀之不敬與人失和而禍之所  
從起也

無易由言無曰苟矣莫捫朕舌言不可逝矣無言不讎  
無德不報惠于朋友庶民小子子孫繩繩萬民靡不承  
捫持也逝發也君子告王使無輕從人之言無曰苟  
如是而已雖無有持吾舌者然而言不可以妄發何  
者言行之出未有不反報之者也苟能惠其朋友以  
至於庶民則民思戴其子孫繩繩而不絕矣

視爾友君子輯柔爾顏不遐有愆相在爾室尚不愧于  
屋漏無曰不顯莫予云覲神之格思不可度思矧可射

思

吾視王所與友者皆求所以和柔王顏而已莫敢正  
言犯王者左右無正人焉吾以是知其有咎不遠矣  
苟以為不信曷不視其在爾室者尚且不愧于屋漏  
况其遠者乎人之愧于屋漏也曰莫予見者耳神之  
至也尚不可得而知之矧可得而厭之哉言人雖莫  
見而神鑒之也西北隅曰屋漏格至也

辟爾為德俾臧俾嘉淑慎爾止不愆于儀不僭不賊鮮

不為則投我以桃報之以李彼童而角實虹小子

辟法也虹潰也人君苟脩其德而慎其容止無僭偽  
殘賊之行則民鮮不可以為法矣譬如投之以桃而  
報之以李不可誣也今王無其實而欲求民之法之  
則亦譬如童羊而求有角之用人誰信汝哉徒自潰  
而已

荏染柔木言緡之絲溫溫恭人維德之基其維哲人告  
之話言順德之行其維愚人覆謂我僭民各有心

緡被也木柔矣而被之以絲則可以為弓不柔者雖被之不從也故為溫恭之人然後可以入德告之以語言則順之彼愚者反謂我欺之耳人心之不同如此此君子所以憂憤而無如之何也

於乎小子未知臧否匪手攜之言示之事匪面命之言提其耳借曰未知亦既抱子民之靡盈誰夙知而莫成王不知善惡而告之者亦至矣苟以為尚少而未知歟則亦既抱子非少矣靡盈不足也人之才性有所

未足獨患不知苟其蚤知則蚤成之豈有蚤知而晚成之者言王之不能有成由不知也

昊天孔昭我生靡樂視爾夢夢我心慘慘誨爾諄諄聽我藐藐匪用為教覆用為虐借曰未知亦聿既耄

夢夢昏亂也諄諄款誠也藐藐不入也君子之諫王王非以為教之也以為虐之耳

於乎小子告爾舊止聽用我謀庶無大悔天方艱難曰喪厥國取譬不遠昊天不忒回遹其德俾民大棘

舊久也止辭也天方艱難周室曰吾將喪其國譬如  
夏商其類不遠天豈復有差忒不然者哉然王曾不  
悟益為邪僻之行使民至於困急而無告也

抑十二章三章章八句九章章十句

桑柔芮伯刺厲王也

芮伯為卿士字良夫

苑彼桑柔其下侯甸將采其劉瘼此下民不殄心憂倉  
兄填兮倬彼昊天寧不我矜



菀茂也旬徧也劉殘也殄絕也倉悲也兄滋也填久也桑之為物其葉最盛然及其采之一朝而盡無黃落之漸故詩人取以為比言周之盛也如柔桑之茂其陰無所不徧至於厲王肆行暴虐以敗其成業則王室忽焉凋弊如桑之既采民失其蔭而受其病故君子憂之不絕於心悲之益久而不已號天而訴之也

四牡騤騤旟旐有翩亂生不夷靡國不泯民靡有黎具

禍以燼於乎有哀國步斯頻

厲王之亂天下征役不息故其民見其車馬旌旗而厭苦之夷平也泯滅也黎衆也具俱也燼灰燼也國步國之動也頻數也畜大物者惡數動之故以國步斯頻為哀也

國步蔑資天不我將靡所止疑云徂何往君子實維秉心無競誰生厲階至今為梗

將養也疑定也競彊也動而無所資天不吾養矣而

王尚不求所止定欲行而安往哉故曰王則實然其  
秉心無彊是以不能有所定者夫惟彊而能立然後  
可與止亂而起廢

憂心慙慙念我土宇我生不辰逢天憊怒自西徂東靡  
所定處多我覯瘠孔棘我圉

比章行役者之怨也憊厚也瘠病也多矣我之遇病  
也急矣我之捍禦也

為謀為毖亂况斯削告爾憂恤誨爾序爵誰能執熱逝

不以濯其何能淑載胥及溺

嗟慎也王豈不為謀且慎哉然而不得其道適所以  
長亂而自削耳故告之以其所當憂誨之以叙爵曰  
誰能執熱而不濯者賢者之能已亂猶濯之能解熱  
耳今王之所任者其何能善哉則相與入於陷溺而  
已

如彼邈風亦孔之僂民有肅心莽云不逮好是稼穡力  
民代食稼穡維寶代食維好

遡鄉也僂也肅進也莽使也君子視厲王之亂悶  
然如遡風之人喼而不息雖有欲進之心皆曰世亂  
矣非吾所能及也於是退而稼穡盡其筋力與民同  
事以代祿食而已當是時也仕進之憂甚於稼穡之  
勞故曰稼穡維寶代食維好言雖勞而無患也

天降喪亂滅我立王降此蟲賊稼穡卒痒哀恫中國具  
贅卒荒靡有旅力以念穹蒼

立王王之所恃以立者也痒病也恫痛也贅屬也荒

空也言天下無有不罹其禍而至於空匱者也旅衆也言羣臣無肯併力以念天禍者也

維此惠君民人所瞻秉心宣猶考慎其相維彼不順自獨俾臧自有肺腸俾民卒狂

惠順也民人所瞻言無所隱伏也既持其心又博謀於衆而考之於其輔相此所以無不順也今則不然自獨俾臧自謂賢也自有肺腸自用其心也此民之所以不順也

瞻彼中林。雉雉其廐。朋友以譖。不胥以穀。人亦有言。進退維谷。

雉雉衆也。朋友相譖。不能相善。曾鹿之不如。是以進退無不陷焉者。

維此聖人。瞻言百里。維彼愚人。覆狂以喜。匪言不能。胡斯畏忌。

聖人明於成敗。所視而言者。百里無遠而不察。愚人不知禍之將至。則反狂以喜。雖然。彼未必不知也。乃

以畏王而不敢言耳

維此良人弗求弗迪維彼忍心是顧是復民之貪亂寧  
為荼毒

迪進也厲王之於賢者未嘗求而進之至於殘忍之  
人則顧念重複而不能已上之所好下之所趨也故  
民貪於昏亂安為荼毒之行以求合王意

大風有隧有空大谷維此良人作為式穀維彼不順征  
以中垢



隧道也大風之起必有所從來者有空大谷則風之所從起也厲王之不善民之所從惡也征行也垢穢也言善人之作也以用其善小人之行也以播其穢皆發其中之所有於外也

大風有隧貪人敗類聽言則對誦言如醉匪用其良覆俾我悖

風之起也有道類之敗也有自貪人在上則類之所由敗也聽言道聽之言也誦言先王之言也悖逆也

由王不用善反使天下皆為逆德也

嗟爾朋友予豈不知而作如彼飛蟲時亦弋獲既之陰  
女反予來赫

君子既責其君則又責其僚友曰我豈不知爾所為  
哉爾自謂莫吾禁者譬如飛鳥孰能執之然時亦有  
弋而獲之者憂其獲也覆庇而告之柰何反以言赫  
我哉

民之罔極職涼善背為民不利如云不克民之回遹職

競用力

民之不可測知職汝信用反覆之人也上之害民如恐不勝故民日以邪僻由上用力而競之也

民之未戾職盜為寇涼曰不可覆背善詈雖曰匪予既作爾歌

戾定也民之未定職上有盜賊之臣為之寇也女苟信以為是不可則又曷為反背詈我哉爾雖曰是非我所為既作爾歌矣不可欺也

桑柔十六章八章章八句八章章六句

雲漢仍叔美宣王也

仍叔周大夫也

倬彼雲漢昭回于天王曰於乎何辜今之人天降喪亂  
饑饉薦臻靡神不舉靡愛斯牲圭璧既卒寧莫我聽

雲漢水之精也昭明也回轉也宣王遭旱而懼夜仰  
河漢以觀雨之候而不得曰今之人何罪而罹此禍  
靡神不舉而莫吾聽也禮國有凶荒則索鬼神而祭

之

旱既大甚，蘊隆蟲蟲，不殄禋祀。自郊徂宮，上下奠瘞。靡神不宗，后稷不克。上帝不臨，耗斁下土。寧丁我躬。

蘊，結也。隆，盛也。蟲蟲，熱也。殄，絕也。郊，天地也。宮，宗廟也。上，祭天下；祭地，奠其禮瘞其物。宣王憂旱，百神無所不舉。然后稷不能救，上帝不復饗窮而無告，故曰與其耗敗下土，寧使我躬當之，無使人人被其患也。旱既大甚，則不可推兢，兢兢業業如霆如雷，周餘黎民靡

有子遺昊天上帝則不我遺胡不相畏先祖于摧

推遷也言王欲以身當之而不能也兢兢恐也業業  
危也恐懼之甚如雷霆震於其上也天將不復使我  
有遺餘胡為尚不相畏哉先祖之業將於是摧落矣  
早既大甚則不可沮赫赫炎炎云我無所大命近止靡  
瞻靡顧羣公先正則不我助父母先祖胡寧忍予

沮止也早既不止民咸曰我無所庇死不遠矣然曾  
莫有瞻顧之者羣公先正先王之臣也庶官之長曰

正

旱既大甚滌滌山川旱魃為虐如惓如焚我心憚暑憂  
心如熏羣公先正則不我聞昊天上帝寧俾我遜

旱甚則山川草木皆盡如滌去也魃旱神也憚畏也  
宣王所以祈旱者至矣而莫之答故曰苟吾之不善  
不當天心則寧使我遜去以避賢者無以我故苦此  
庶民也

旱既大甚魃畏去胡寧瘳我以旱憐不知其故祈年

孔夙方社不莫昊天上帝則不我虞敬恭明神宜無悔  
怒

始以旱故欲遜去以避賢者既又以為棄位以避憂  
患非人主之義故黽勉不去以求濟斯難畏不敢也  
癘病也方社祭社及四方也虞度也悔恨也

旱既大甚散無友紀鞠哉庶正疚哉冢宰趣馬師氏膳  
夫左右靡人不周無不能止瞻印昊天云如何里

旱既甚國用空竭無以紀綱羣臣朋友故歷告之曰



鞠矣疚矣然而尚相戒以無所不周無以不能而止  
宣王遭旱始欲以身當之而不得中欲以身遜之而  
不敢故於其終仰而訴之於天曰將使我如何居哉  
里居也

瞻印昊天有嘒其星大夫君子昭假無羸大命近止無  
棄爾成何求為我以戾庶正瞻印昊天曷惠其寧

昭明也假至也宣王印以候雨而見星焉故告其羣  
臣曰明矣至矣爾之無私羸矣然民之死亡不遠無

有不周以棄爾之成功且我亦何求為哉將以定爾  
庶正而已未有民不寧而庶官定者也於是又印而  
懇天曰曷不惠而寧之哉

雲漢八章章十句

崧高尹吉甫美宣王也

尹吉甫周之卿士

崧高維嶽駿極于天維嶽降神生甫及申維申及甫維  
周之翰四國于蕃四方于宣

山大而高曰崧駿大也唐虞之間姜氏實為四嶽掌  
嶽之祀嶽神享之而祐其子孫於周齊許申甫皆其  
後也在穆王之世其賢者曰甫侯宣王之世曰申伯  
實能屏翰周室蔽其患難而宣其德澤於天下

亹亹申伯王纘之事于邑于謝南國是式王命召伯定  
申伯之宅登是南邦世執其功

纘繼也謝周之南土也南陽有申城申伯國也召伯  
召公虎也登成也

王命申伯式是南邦因是謝人以作爾庸王命召伯徹申伯土田王命傅御遷其私人

庸城也徹定其稅也傅御傅王治事之臣也私人家臣也

申伯之功召伯是營有俶其城寢廟既成既成藐藐王錫申伯四牡騶騶鈞膺濯濯

俶作也藐藐深貌也騶騶壯貌也濯濯光明貌也

王遣申伯路車乘馬我圖爾居莫如南土錫爾介圭以

作爾寶往近王舅南土是保

圭尺二寸謂之介非諸侯之圭故賜以為寶近辭也  
讀如彼已之子之已

申伯信邁王餞于郿申伯還南謝于誠歸王命召伯徹  
申伯土疆以峙其糧式迨其行

王在岐周故餞之於郿謝于誠歸誠歸于謝也召伯  
之營謝也則已峙其餼糧使廬市有止宿之委積故  
能使申伯無留行也

申伯番番既入于謝徒御嘽嘽周邦咸喜戎有良翰不顯申伯王之元舅文武是憲

番番勇武貌也申伯既入于謝周人皆曰汝有良翰蔽矣文武是憲言其文武皆足法也

申伯之德柔惠且直揉此萬邦聞于四國吉甫作誦其詩孔碩其風肆好以贈申伯

揉順也肆極也

崧高八章章八句

烝民尹吉甫美宣王也

天生烝民有物有則民之秉彝好是懿德天監有周昭假于下保茲天子生仲山甫

人生而耳目心志莫不固有此所謂有物也人莫不有是物是物莫不有知故耳則能聽目則能視心則能慮物用其能則知可否此所謂有則也故民能秉常則莫不好德維其失常乃有不善天之監周也其明實至於下將保安宣王乃生仲山甫以佐之凡宣

王之所以能全其性而無失其常者皆仲山甫之功也詩曰豈弟君子俾爾彌爾性

仲山甫之德柔嘉維則令儀令色小心翼翼古訓是式威儀是力天子是若明命使賦

力勉也若順也賦布也

王命仲山甫式是百辟纘戎祖考王躬是保出納王命王之喉舌賦政于外四方爰發

戎女也發發而應之也



肅肅王命仲山甫將之邦國若否仲山甫明之既明且  
哲以保其身夙夜匪解以事一人人亦有言柔則茹之  
剛則吐之維仲山甫柔亦不茹剛亦不吐不侮矜寡不  
畏彊禦人亦有言德輶如毛民鮮克舉之我儀圖之維  
仲山甫舉之愛莫助之哀職有闕維仲山甫補之  
輶輕也儀匹也愛惜也哀職王職也上有過失下莫  
敢言而獨補之比以見其能舉德也

仲山甫出祖四牡業業征夫捷捷每懷靡及四牡彭彭

八鸞鏘鏘王命仲山甫城彼東方

王命仲山甫城齊祖祭而行其馬業業而健其徒捷捷而敏猶常恐不及事也東方則齊也

四牡騤騤八鸞喈喈仲山甫徂齊式迺其歸吉甫作誦穆如清風仲山甫永懷以慰其心

此詩言仲山甫其始曰仲山甫之德柔嘉維則令儀令色小心翼翼古訓是式威儀是力此與漢胡廣趙戒何異其終曰人亦有言柔則茹之剛則吐之維仲

山甫柔亦不茹剛亦不吐不侮鰥寡不畏彊禦此與  
漢汲黯朱雲何異胡趙柔而陷於佞汲朱剛而近於  
狂如仲山甫內剛外柔非佞非狂然後可以為王者  
之佐當天下之事矣嗚乎非斯人其誰與歸

烝民八章章八句

韓奕尹吉甫美宣王也

奕奕梁山維禹甸之有倬其道韓侯受命王親命之纘  
戎祖考無廢朕命夙夜匪解虔共爾位朕命不易幹不

庭方以佐戎辟

奕奕大也梁山韓之鎮也禹貢所謂治梁及岐者在  
今同之韓城甸治也禹之治水也九州之鎮山無所  
不向雖梁山亦禹之所向也韓武之穆也將言韓侯  
故先叙其國曰梁山之下有倬然之道此韓侯之所  
從朝周以受命者也戎女也不庭不來庭也辟君也  
四牡奕奕孔脩且張韓侯入覲以其介圭入覲于王王  
錫韓侯淑旂綏章簞第錯衡玄衮赤舄鈎膺鏤錫鞞

淺幪幪革金厄

脩長也張大也介圭韓所貢也諸侯秋見天子曰覲  
淑善也交龍為旂綏大綏也眉上曰錫刻金飾之曰  
鏤錫鞞革也鞞式中也淺皮也幪覆式也幪革鞞首  
也以金為小鐶而纏搯之

韓侯出祖出宿于屠顯父餞之清酒百壺其殽維何魚  
鼈鮮魚其藪維何維筍及蒲其贈維何乘馬路車籩豆  
有且侯氏燕胥

既覲而反國必祖者尊其所往去則如始行焉屠地名也顯父周之卿士也王寵韓侯故使顯父餞之藪菜穀也筍竹萌也蒲蒲弱也且多貌也侯氏諸侯之與餞者也胥辭也

韓侯取妻汾王之甥蹶父之子韓侯迎止于蹶之里百兩彭彭八鸞鏘鏘不顯其光諸娣從之祁祁如雲韓侯顧之爛其盈門

汾主厲王也厲王流于彘晉霍邑是也在汾水之上

詩人以目王焉猶言莒郊公黎比公也蹶父周之卿士  
姑姓也諸侯一娶九女二國媵之諸娣諸媵也

蹶父孔武靡國不到為韓姑相攸莫如韓樂孔樂韓土  
川澤訏訏魴鰈甫甫麀鹿嘒嘒有熊有羆有貓有虎慶  
既令居韓姑燕譽

蹶父以王事行於四方為其子相善處而嫁之莫如  
韓之樂者訏訏甫甫大也嘒嘒衆也貓似虎而淺毛  
慶善也蹶父以此善韓而使韓姑居焉譽樂也

溥彼韓城燕師所完以先祖受命因時百蠻王錫韓侯  
其追其貊奄受北國因以其伯實墉實壑實畝實藉獻  
其貔皮赤豹黃羆

溥大也燕樂也王以韓侯之先因是百蠻而長之故  
錫之以追人貊人受之以北方之國使復為之伯焉  
韓侯於是命諸侯各脩其城池治其田畝正其税法  
以時貢其所有於王墉城也壑池也藉稅也

韓奕六章章十二句



江漢尹吉甫美宣王也

江漢浮浮武夫滔滔匪安匪遊淮夷來求既出我車既設我旗匪安匪舒淮夷來鋪

浮浮水盛貌也滔滔順流貌也淮夷夷之在淮上者也鋪病也宣王自周而南出於江漢之間命召公率兵循江而下以伐淮夷行者皆莫敢安徐曰吾之來也維淮夷是求是病言用命也

江漢湯湯武夫洸洸經營四方告成于王四方既平王

國庶定時靡有爭王心載寧

洸洸武貌也淮夷既平遂經營其旁國以告于王  
江漢之許王命召虎式辟四方徹我疆土匪疚匪棘王  
國來極于疆于理至于南海

極中也王命召公闢四方之侵地而治其疆界非以  
病之非以急之也使來於王國取中焉耳召公於是  
疆理其地至南海而止

王命召虎來旬來宣文武受命召公維翰無曰予小子

召公是似肇敏戎公用錫爾祉

旬徧也宣布也肇開也敏疾也公事也南方旣平王  
命召公來歸於周以徧治四方而布行其政曰昔文  
武受命維召康公實為之翰女實肖召公之德開敏  
於戎事我是用錫汝以福

釐爾圭瓚秬鬯一卣告于文人錫山土田于周受命自  
召祖命虎拜稽首天子萬年

釐賜也秬鬯黑黍酒也卣尊也九命則賜圭瓚秬鬯

以祭文人其先祖之有文德者也既錫之禮命又廣其封邑使受命於岐周用其祖召康公受封之禮焉岐周有先王之廟且召康公所從受封也

虎拜稽首對揚王休作召公考天子萬壽明明天子令聞不已矢其文德洽此四國

對答也考成也矢施也王命召公用召祖命故虎之答王亦為召康公所以對成王命受之辭自天子萬壽以下召康公之遺意也

江漢六章章八句

常武召穆美宣王也

武不可常也宣王之征徐方王猶允塞而徐方既來  
兵不勞而民不病則可常也然六月歌尹吉甫采芑  
歌方叔而在小雅崧高歌申伯烝民歌仲山甫韓奕  
歌韓侯江漢歌召虎常武歌皇父而在大雅槩言之  
則七詩若無以異精言之則在小雅者皆征伐政事  
而已在大雅者皆君臣同德有不知其所以然而致

者比其所以異也

赫赫明明王命卿士南仲大祖大師皇父整我六師以脩我戎既敬既戒惠比南國

宣王命其卿士皇父南征徐方皇父以卿士而兼大師其大祖南仲則文王之所使伐玁狁者也蓋稱其世功以褒大之

王謂尹氏命程伯休父左右陳行戒我師旅率彼淮浦省此徐土不留不處三事就緒

尹氏尹吉甫也蓋以卿士兼內史故使之策命程伯  
休父程伯休父於是始為司馬故於兵之出也使  
之左右陳其行列而戒令之曰往循淮之上而視徐土  
無久留處其地以患苦其民使其三有事之臣復就  
其業

赫赫業業有嚴天子王舒保作匪紹匪遊徐方繹騷震  
驚徐方如雷如霆徐方震驚

舒徐也保安也作行也紹急也繹徧也騷動也王之

南征也人望其赫赫業業之威而畏之曰有嚴哉天子也然王則徐而安行不急不緩而徐方之人莫不震動如雷霆作於其上不遑安矣

王奮厥武如震如怒進厥虎臣闕如虢虎鋪敦淮濱仍執醜虜截彼淮浦王師之所

師行至於淮上則遂布其師旅敦集其陳以待之既戰則多執醜虜王師之所在截然無侵略者

王旅嘽嘽如飛如翰如江如漢如山之苞如川之流鯨



縣翼翼不測不克濯征徐國

芑本也縣縣靚也翼翼敬也不測不可測知也不克不可克勝也濯大也淮上諸侯既已服從於是始征

徐國

王猶允塞徐方既來徐方既同天子之功四方既平徐方來庭徐方不回王曰還歸

猶道也王將大征徐國兵未及之徒以王道允塞而徐人來服矣來庭來王庭也回違也

常武六章章八句

瞻卬凡伯刺幽王大壞也

瞻卬昊天則不我惠孔填不寧降此大厲邦靡有定士  
民其瘵螽賊螽疾靡有夷屆罪罟不收靡有夷瘵

填久也瘵病也夷平也屆極也瘳愈也國有所定則  
民受其福無所定則受其病於是有小人為之螽賊  
刑罰為之罔罟凡此皆民之所以病也

人有土田女反有之有人有人民女覆奪之此宜無罪女

反收之彼宜有罪女覆說之哲夫成城哲婦傾城懿厥  
哲婦為梟為鴟婦有長舌維厲之階亂匪降自天生自  
婦人匪教匪誨時維婦寺

鞠人忮忒諧始竟背豈曰不極伊胡為慝如賈三倍君  
子是識婦無公事休其蠶織

天何以刺何神不富舍爾介狄維予胥忌不弔不祥威  
儀不類人之云亡邦國殄瘁天之降罔維其優矣人之  
云亡心之憂矣天之降罔維其幾矣人之云亡心之悲

矣

幾近也

鬻沸檻泉維其深矣心之憂矣寧自今矣不自我後藐藐昊天無不克輦無忝皇祖式穀爾後

泉之冽也其源深矣幽王之敗其所從來者亦久矣非今日而然也故君子懼而相戒曰天之藐然遠而難信也無有不自戒敕以求鞏固者庶幾上不忝父祖下不危子孫爾

瞻卬七章三章章十句四章章八句

召旻凡伯刺幽王大壞也

因其首章稱旻天卒章稱召公故謂之召旻以別小旻而已毛氏之序曰旻閔也閔天下無如召公之臣蓋亦衍說矣

旻天疾威天篤降喪殄我饑饉民卒流亡我居圉卒荒篤厚也殄病也卒盡也居國中也圉邊陲也

天降罪罟蟲賊內訌昏椽靡共潰潰回遘實靖夷我邦

訏潰也昏桷刑餘奄人也潰潰亂也靖安也天降罔  
以執有罪使小人為蠹賊以潰其內故昏桷羣小不  
恭之人為邪僻之行安然而夷滅其國

臯臯訛訛曾不知其玷兢兢業業孔填不寧我位孔貶  
臯臯多告訴也訛訛多讒謗也小人臯臯訛訛曾無  
有知其瑕疵者君子居於其間兢兢業業日夜危懼  
久而不安猶不能保其位

如彼歲旱草不潰茂如彼棲苴我相比邦無不潰止

潰遂也直枯草也人之生於此時者憂患多故其生  
不樂如旱歲之草不得遂茂如木上之棲直君子以  
是相其國知其潰亂不久也

維昔之富不如時維今之疚不如茲彼疏斯稗胡不自  
替職兄斯引

言先王之世天下富樂其人固不若是窮矣至於今  
世人民疲病亦未有若此之甚者蓋指言幽王大壤  
之時也疏羶也稗精也兄益也引長也君子與小人

精麤之不同可指而知也小人曷不自替以避君子而乃自任以長此亂也

池之竭矣不云自頻泉之竭矣不云自中溥斯害矣職兄斯弘不裁我躬

頻厓也溥徧也弘大也池水之鍾也泉水之發也故池之竭由外之不入泉之竭由內之不出今外則諸侯不親內則國人不附其害徧至矣然小人猶自任以益大此亂維曰不裁我躬則無所不為曾不顧其




害民以及其國也

昔先王受命有如召公曰辟國百里今也日蹙國百里  
於乎哀哉維今之人不尚有舊

世雖亂豈不猶有舊德可用之人哉言有之而不用  
耳文王之世周公治內召公治外故周人之詩謂之  
周南諸侯之詩謂之召南所謂日闢國百里云者言  
文王之化自北而南至於江漢之間服從之國日益  
衆耳蓋虞芮質成於周其旁諸侯聞之相帥而歸周

者四十餘國然則日闢百里之言不為過矣楚椒舉有言夏桀為仍之會有緡叛之商紂為黎之蒐東夷叛之周幽為太室之盟戎狄叛之皆示諸侯汰也其後齊桓盟諸侯于葵丘震而矜之叛者九國由此觀之闢國以禮感國不以禮皆非用兵之謂也近世小人欲以干戈侵虐四鄰求拓土之功者率以召公藉口此楚靈齊湣之事桓文之所不為而以誣召公烏乎殆哉

召旻七章四章章五句三章章七句



詩集傳卷十七